

საზოგადოებრივ მოძრაობა „ქართულ ოცნებას“

თქვენთვის უკვე ცნობილია, რომ გაცხადებული პოლიტიკური და საარჩევნო მიზნებიდან გამომდინარე, მოძრაობა „ქართულ ოცნება“-ზე ვრცელდება „მოქალაქეთა პოლიტიკური გაერთიანებების შესახებ“ საქართველოს ორგანული კანონის რეგულაციები. შესაბამისად, მოძრაობა „ქართული ოცნების“ ფინანსური საქმიანობის კანონიერება და გამჭვირვალობა საქართველოს კონტროლის პალატის მონიტორინგის საგანს წარმოადგენს.

ფინანსური საქმიანობის მონიტორინგის განხორციელების პროცესში ჩვენთვის ცნობილი გახდა, რომ 2011 წლის 29 დეკემბერს, მოძრაობა „ქართულმა ოცნებამ“ 2011 წლის 26 დეკემბერს გაფორმებული ხელშეკრულების საფუძველზე, მომსახურების შესყიდვის მიზნით საბანკო ანგარიშზე 2 მილიონი ლარი ჩაურიცხა შპს „ელიტა ბურჯმა“.

2012 წლის 17 იანვარს, შპს „ელიტა ბურჯმა“, მომსახურების სანაცვლოდ გადახდილი 2 მილიონი ლარიდან, 100.000 ლარი უკან გადაურიცხა მოძრაობა „ქართულ ოცნებას“. აღნიშნული ფაქტიდან 3 დღეში, შპს „ელიტა ბურჯმა“ 2012 წლის 20 იანვარს გაფორმებული ახალი ხელშეკრულების საფუძველზე, 100.000 ლარის გარდა, მოძრაობა „ქართულ ოცნებას“ კიდევ 1 მილიონი ლარი დაუბრუნა ანგარიშზე.

ვთვლით, რომ სახეზეა მოჩვენებითი, თვალთმაქცური გარიგების ნიშნები. ორივე ორგანიზაცია რეალურად ეკუთვნის ერთიდაიმავე ფიზიკურ პირს, მოძრაობა „ქართული ოცნების“ გამგეობის თავმჯდომარეს - ბიძინა ივანიშვილს და

შესაბამოდ, თავად არის დამკვეთიც, შემსყიდველიც და შემსრულებელიც. შპს „ელიტა ბურჯსა“ და მოძრაობა „ქართულ ოცნებას“ შორის გარიგება დადებულია მხოლოდ მოსაჩვენებლად, იმ განზრახვის გარეშე, რომ შეთანხმებას შესაბამისი იურიდიული შედეგები მოჰყოლოდა. „მოქალაქეთა პოლიტიკური გაერთიანებების შესახებ“ საქართველოს ორგანული კანონის მიხედვით კი ბათილია ყველა გარიგება, რომელიც მიზნად ისახავს კანონით დადგენილი წესებისა და შეზღუდვებისათვის თავის არიდებას. ამგვარი გარიგების საფუძველზე გაცემული და მიღებული ქონება მიექცევა სახელმწიფოს საკუთრებაში.

ამ შემთხვევაშიც მიგვაჩნია, რომ ზემოაღნიშნული ქმედებები განხორციელდა „მოქალაქეთა პოლიტიკური გაერთიანებების შესახებ“ საქართველოს ორგანული კანონის რეგულაციების გვერდის ასავლელოდ და მიზნად ისახავს იურიდიული პირისაგან, კონკრეტულ შემთხვევაში შპს „ელიტა ბურჯისაგან“ მიღებული კანონით აკრძალული შემოწირულობისათვის კანონიერი სახის მინიჭებას.

საქართველოს კონტროლის პალატის ფინანსური მონიტორინგის სამსახური „მოქალაქეთა პოლიტიკური გაერთიანებების შესახებ“ საქართველოს ორგანული კანონით მონიჭებული მანდატის საფუძველზე ვალდებულია, რეაგირება მოახდინოს კანონის რეგულაციების გვერდის ავლის ყველა მსგავს მცდელობაზე. ჩვენ საქმიანობის განხორციელების პროცესში ყველა პოლიტიკურ სუბიექტთან და „მოქალაქეთა პოლიტიკური გაერთიანებების შესახებ“ საქართველოს ორგანული კანონის 26¹ მუხლით განსაზღვრულ პირებთან თანამშრომლობას ვგეგმავთ. შესაბამისად, კანონით გათვალისწინებული სანქციების გამოყენების თავიდან ასაცილებლად გაძლევთ წინადადებას, მოძრაობა „ქართული ოცნების“ ანგარიშზე იურიდიული პირის - შპს „ელიტა ბურჯის“ მიერ ჩარიცხული თანხა 1.100.000 ლარი (ერთი მილიონ ასი ათასი ლარი) გადარიცხონ უკან - შპს „ელიტა ბურჯის“ ანგარიშზე.

ნათია მოგელაშვი

პოლიტიკური პარტიების ფინანსური მონიტორინგის
სამსახურის უფროსი